

UPA2026/145: Pisortat suliffeqarfiutaanni tamani inuttassarsiuussinerit suliamut tunngasumik piginnaasaqarnissaat piumasaqaataassaaq, kalaallit oqaasinik piginnaasaqarneq ilanngullugu kiisalu kalaallit kulturiannut kalaallillu inuiaqatigiivinit ilisimasaqarnissaat pillugit Naalakkersuisut Inatsisartunut inatsissamik suliaqaqqullugit peqquneqarnissaannik Inatsisartut aalajangiiffigisassaattut siunnersuut. Inatsimmut siunnersuut UKA2026-mi kingusinnerpaamik saqqummiunneqassaaq.

(Inatsisartuni Naleqqap Gruppia, Naleraq)

Akissuteqaat

(Naalakkersuisut Siulittaasuat)

Aappassaaneerineq

Inatsisartut Inatsisinut Ataatsimiititaliata aalajangiiffigisassatut siunnersuummik, Siumullu allannguutissatut siunnersuutaannik peqqissaarullugu suliaqarnerinut qujanaq.

Inatsisinut Ataatsimiititaliami amerlanerussuteqartut inassutigaaq, Siumut allannguutissatut siunnersuutaat kiisalu siunnersuutaqqaartoq itigartitsissutigineqassasut.

Massakkut inatsisitigut inissisimanermut siunnersuutip allannguinnginnissaanik, allaanerusumillu tamanna aalajangersarneqaannarneranik ataatsimiititaliap isumaanut Naalakkersuisut isumaqataapput. Kiap piukkunnarnerpaaneranik naliliinissami kalaallit oqaasiinut, kulturiannullu ilisimasaqarneq pissusissamisuginnartumik ilaatinneqartassaaq.

Taakkua oqaatigalugit Naalakkersuisut innersuussutigiumavaat, Inatsisinut Ataatsimiititaliap inassuteqaataa malinneqassasoq, siunnersuullu itigartinneqassasoq inassutigalugu.